

Dithero tsa Tirelano mo Kutlwanong

57/2014 Ka Sontaga wa bofelo morago ga moletlo wa Modimo o o Borarobongwe, e le ka 23. 11. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno le kwadilwe mo go Luka 12:35, le re: **"A matheka a lona a nne a tlamilwe, le dione tsa lona di tuke!"**

1. Sefela sa 330 - 305/313

2. Thapelo: Morena Modimo, re a leboga, gonne o re tshegeditse, go fitlhela mo letsatsing la kajneo. Ke gona re kopang mo go wena gore o tiise tumelo ya rona ka ene Jesu Keresete. O re femele mo go tsotlhe tse di batlang go re kgaoganya nao. A o bokiwe, Morena ka metlha, gonne tlotlo ke ya gago, gape ke wena fela yo e leng Modimo o o tshelang. Simolola sešwa gore re abelwe mo tirelong-Modimo eno thata go go tumisa ka pelo yotlhe ka Jesu Keresete, Morena wa rona. Amen.

3. Lefoko la Testamente e kgologolo le kwadilwe mo go Jesaya 65:17-25;
Epistolo ka fa thulaganyong ya 2 e kwadilwe mo go Tshenolo 21:1-7;
Efangele ka fa thulaganyong ya 1 e kwadilwe mo go Matheo 25:1-13.

4. A go ipolelwe tumelo ya bokeresete!

5. Sefela sa 332 - 307/315

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go 2 Petoro 3:3-13, e re: "Itseng pele gore mo malatsing a bofelo go tla tla basotli ba ba tsamayang ka fa dikeletsong tsa bone, ba sotla, ba re: 'E kae, polelelo-pele ya go tla ga gagwe? Kana e sa le borara ba robala, dilo tsotlhe di sa ntse di ntse fela jaaka mo tshimologong ya tlholego.' Gonne ba itebaditse ka bomo gore magodimo a sa le a nna teng bogologolo, le gore lefatshe le le tswang mo metsing le ka thata ya metsi le dirilwe ka Lefoko la Modimo. Ke ona a lefatshe la sebaka sele le senyegileng ka ona, e bong ka morwalela. Mme magodimo a gompiano le lefatshe di boloketswe molelo ka Lefoko la ona, di beelwa letsatsi la katlholo le tshenyego ya batho ba ba ikepileng. Baratwa, lo se ka lwa lebala selo se le sengwe sa go re: Mo Moreneng letsatsi le le lengwe le tshwana le sekete sa dinyaga, le

sekete sa dinyaga se tshwana le letsatsi le le lengwe. Morena ga a diegise polelelo-pele, jaaka bangwe ba kaya e le tiego, mme o pelotelele le lona, ka a sa rate gore bangwe ba latlhege, mme o rata gore botlhe ba sokologe. Mme letsatsi la Morena le tla tla jaaka legodu bosigo, magodimo a tla fela ka lone ka modumo o mogolo; dilo tse lefatshe le bopilweng ka tsona di tla tuka, di nyelela; lefatshe le ditiro tse di mo go lone di tla šwa. E re ka tsotlhe tseo di tla nyelela jalo, lo tshwanetse lwa nna batho ba tsamano e e boitshepo, ba poifo-Modimo bogolo jang ne, lo lebeletse, lo bile lo rata go akofisa go tla ga letsatsi la Modimo le magodimo a tla šwang ka lone, a nyelela; tse lefatshe le bopilweng ka tsona di tla tuka, di gakologa ka mogote! Mme re lebeletse magodimo a mašwa le lefatshe le lešwa ka fa tsholofetsong ya ona, mo tshiamo e agileng teng." Amen.

8. Thero: Barategi mo Moreneng, re a itse gore tsotlhe di na le tshimologo, gape tsotlhe di na le bokhutlo, mme ga go na ope yo o itseng gore bokhutlo bo tla diragala leng. Seo se setse se gogetse bangwe mo boitsietsong, ba re: ba leke go tshegisa batho ka go bua gore ga go na bokhutlo jwa malatsi lefatsheng, le fa go setse go builwe bogologolo, le go itsise batho pele di ise di fele gore tsa lefatshe di tla fela. Mafoko ao ga ba a tlhokomele, mme ba tsoseletsa gore go tsamaiwe ka fa dikeletsong. Lefoko le a re tlhagisetse gore tota ka malatsi ao a bofelo ba tla kgona mo ponatshegong go tshegisa batho ka dipolelelo-pele tseo tsa Morena. Tota ba a itse gore Jesu o a solofetsa gore o tla bowa go athola batshedi le baswi, le go kgaoganya dipodi le dinku. Mme bangwe ga ba dumele, ba re: Go ne go sa fetoge sepe, tsotlhe di ntse fela, jaaka di ne di ntse go tswa mo tshimologong ya tlholego ya lefatshe. Potso eo e tlhagile, gonne ba re: Go monate go tsamaya ka fa dikeletsong tsa lefatshe. Lefoko le a re ruta gore Modimo o bala malatsi ka pharologanyo e kgolo e e faofologanang le go bala ga batho. Rona batho ga re ka ke ra bona gore a mantsi thata malatsi a a setseng a fetile, mme mo Modimong bontsi jwa matsatsi a tshwana le letsatsi le le lengwe fela. Tota, phuthego ya ga Keresete e tlhagisediwa gore e nne e tlhokomele tumelo e e lefela eo e e rutang tse di fapaanang le tsholofetso ya Morena Jesu.

Lefoko le di baya tsa tlholego ya Modimo, di utlwala sentle gore ba ba buang ditimetso tsele, ba lebetse tse di kwadilweng gore tse di tlhodilweng ke Modimo di ne di

le teng go tswa mo tshimologong ka fa godimo o di tlhodileng ka teng, jaaka di ntse di le teng ka Lefoko la Modimo. Ba lebetse le gore ka letsatsi lele tlholego ya tlhodilweng ka lona, fela jalo Lefoko le re senoletse, fa tlholego e tla senngwa ka molelo. Go kwadilwe gore re lebelele letsatsi la katlholo, fa tsotlhe di tla digwa, go senngwa ka go fiswa fela ka molelo. A re tlhokomeleng tse di kwadilweng! Go na le matsatsi a bofelo, mmogo le letsatsi la katlholo le go tla atlholelwang ka lona fa gare ga ba ba boifang Modimo, le ba ba sa o boifeng. Go o boifa go raya gore ba ba o boifang ba o direla, ba tumisa Rra-thata-yotlhe.

Se se tlhokegang, se se tshwanetseng ke go go dumela tseo, re se belalele ka tsona ka tsa gore Morena wa rona Jesu Keresete e dirafatsa tsholofetso ya gagwe. Ga a solofetsa phuthego ya gagwe sepe se se lefela. Ga a nke a lebala tse a di solofeditseng, e seng ka gope. Ka moo a re tlhokomeleng gore ba ba lekang go re timetsa ba teng. Lefoko le re tlhalosetsa sentle gore Modimo o a tiisa gore phatlha e teng gore rotlhe re tlhabologe, gonne ga o batle gore motho a latlhege, le e seng a le mongwe. Ka tsholofetso eo re bona bopelotlhomogi le bopelotelele jo bogolo jo Modimo o godisang ka jona lorato lwa ona lwa go rata batho botlhe, o a rata gore ba sokologele mo go ona, ba dumele mo Modimong o o tshelang, ba tlogele ditsela tsa bolele tse di isang tatlhegong. A re gopoleng tota, fa Modimo o itumelela moleofi, le fa a le mongwe fela, yo o tlhabologang. Ke ka ntlha ya moo, fa o romile Morwaaona yo o tsetsweng a le ese gore yo o dumelang mo go ene a se ka a latlhega, mme a nne le botshelo jo bo sa khuleng.

Ke mang yo o itseng gore letsatsi la Morena le tla tla leng? Ga go na ope yo o itseng, fa e se Modimo. Go senolwa ga letsatsi leo go tshwantshiwa le legodu le le tlang go tlhasela, le go tshoganyetsa motho. Ka moo ke tshwanelo gore re nne re letetse, gonne ga re itse nako, le e seng motsotso o re tla tshoganediwang ka ona. Re na le tse dingwe ka fa Lefokong le le supang tsela e re tshwanetseng go tsamaya le go tshela ka yona. Le a re ruta gore re nne re tsamaye ka boitsheko, re dire thato ya Modimo, re o tlotle, re ntse re golela botsofe, le katamelo le kgorogo ya letsatsi. Go tlhokega go tsamaya ka boitsheko, gonne Modimo ka nosi o boitshepo. Ka jalo boitshepo jwa ona bo teng le mo phuthegong. Ka moo go tsamaya ka fa dikeletsong tsa nama ga go utlwane, e seng ka

sepe le boitshepo jwa Modimo. Re solofediwa tota gore tsotlhe tseo tse re di bonang di na le bokhutlo jwa tsona. Ga se bokhutlo jo bo itumedisang, gonne di tla nyelela. Kana "MORENA o tla atlhola batho botlhe, a ba betsa ka molelo le ka tšhaka ya gagwe," Jes. 66:16.

Phuthego e a kgothadiwa gore e lebelele "magodimo a mašwa le lefatshe le lešwa ka fa tsholofetsong ya ona, mo tshiamo e agileng teng." Ka moo lefoko le le kwadilweng mo go Bahebere le re: "Gonne mono ga re na motse o o tihomameng, mme re batla o o tleng," Baheb. 13:14. Keletso ya rona e lebelele, e letele lefatshe le lešwa le magodimo a mašwa e re gopotsa maikaelelo a Modimo a tshimologo ya tiholego ya legodimo le lefatshe, gonne Lefoko le re: "Gonne bonang, ke tla tlhola legodimo le lešwa; mme dilo tsa pele ga di kitla di goplwa, le e seng go di gakologelwa ka pelo," Jes. 65:17. Ke gona kwa re tla fitlhelang teng boitumelo ka go busediwa mo kemong ya dilo tse di sa ngaparelwang ke bosula jwa boleo. Ka moo, phuthego e e rategang, a re itshwareleleng mo tumelong e e pholosang ya go dumela mo go Jesu Keresete, Morena wa rona! Kana tumelo ya rona ga e ikaege mo ditirong tse re di dirang, mme e ikaega, e eme ka ditiro tse dikgolo tse re di diretswang ke Keresete mo sefapaanong. Jesu o a re solofetsa gore kwa gae mo legaeng la ga Rara go na le manno a le mantsi a re a baakanyeditsweng ke Jesu. Ke gona ka moo Jesu e leng "tsela, boammaaruri le botshelo, ga go ope yo o ka fitlhang kwa go Rara, fa e se ka" ene. A re dumeleng mo go ene ka metlha, re se na pelaelo, go ya bosenangbokhutlo. Amen.

9. Thapelo: Morena, re a lebogela go utlwa Lefoko la gago le le re abelang botshelo jo bo sa khutleng ka Jesu Keresete, ka go itshwarelwa mo leineng la gagwe, o nne o re tiise mo tumelong, o be o re femele mo bosuleng jotlhe. Ke se re se kopang ka ene Jesu Keresete, Morena wa rona. Amen. Thapelo ya Morena: Rara wa rona yo o mo legodimong ...

10. Sefela sa 333 - 308/316

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Leresete Jesu

Thero eno e kwadilwe ke S. E. Sithole, ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.